

NEWS CLIPPING – PRESS

CLIENT:	DSA EXHIBITION AND CONFERENCE		
PUBLICATION:	BERITA HARIAN	SECTION:	NASIONAL
DATE:	SATURDAY, 25 JANUARY 2020	PAGE NO.:	12
CIRCULATION:	66,524	FREQUENCY:	DAILY
HEADLINE:	KL, JAKARTA ERAT KERJASAMA KESELAMATAN		

KL, Jakarta erat kerjasama keselamatan

Kuala Lumpur: Menteri Pertahanan, Mohamad Sabu bertemu rakan sejawat, H Prabowo Subianto di Indonesia, semalam.

Dalam satu kenyataan dikeluarkan Kementerian Pertahanan, kunjungan balas Mohamad ke Indonesia bagi membincangkan hal berkaitan kepentingan hubungan dua hala dalam usaha menguatkan aspek keselamatan kedua-dua negara, selain mengeratkan hubungan diplomatik.

Ia sekali gus mencerminkan hubungan pertahanan Malaysia-Indonesia yang kuat dan dinamik.

“Kedua-dua menteri mengadakan perbincangan yang luas dan terbuka, sekali gus mencerminkan kekuatan hubungan dan perkongsian kepentingan antara dua negara.

“Mereka mengulangi komitmen bersama untuk mengukuhkan kerjasama pertahanan yang sedia ada berdasarkan kepentingan bersama, terutama memabatkan kerjasama pembangunan industri pertahanan.

“Oleh itu, Mohamad sempat menyerahkan jemputan kepada Prabowo untuk menghadiri Persidangan dan Pameran Perkhidmatan Pertahanan Asia (DSA 2020) serta Pameran Antarabangsa Keselamatan Kebangsaan 2020

(NATSEC 2020) dijadual berlangsung pada 20 hingga 23 April ini di Kuala Lumpur,” menurut kenyataan itu.

Kenyataan itu menyebut, pertemuan kedua-dua menteri itu turut menyentuh kejadian penculikan yang berlaku, baru-baru ini, membabitkan lima nelayan Indonesia di perairan Tambisan, Sabah.

Kedua-dua menteri menyatakan keyakinan mereka terhadap pelaksanaan Perjanjian Pelaksanaan Trilateral (TCA) yang berkesan antara Indonesia, Malaysia dan Filipina.

Memetik kenyataan itu, ia antara langkah dalam menangani ancaman keselamatan maritim di perairan yang bersempadan dengan negara pantai.

“Mohamad juga memberi penekanan terhadap kesungguhan dan jaminan komitmen Malaysia khususnya Angkatan Tentera Malaysia (ATM) dalam mengamankan kawasan.

“Kedua-dua menteri bersetuju untuk bertemu dengan Setiausaha Pertahanan Filipina, Delfin Lorenzana di luar penganjuran Mesyuarat Menteri-Menteri Pertahanan ASEAN (ADMM) pada Februari 2020 untuk membincangkan lanjut langkah meningkatkan TCA,” menurut kenyataan itu.



Mohamad bertemu Prabowo di Indonesia, semalam.

(Foto ihsan ATM)